

Ada cawangan UMNO di Kelantan kononnya mengesyorkan supaya wang pungutan zakat diambil dijadikan derma kemerdekaan Malaya. Rancangan ini disokong pula nampaknya dari suku sakat UMNO. Atau boleh jadi juga dari “ustaz” yang pandai berbahasa Arab di dalam UMNO mengatakan bahawa tuntutan kemerdekaan yang dikehjarnya oleh UMNO (tidak disebutnya bersama M.C.A) ialah untuk memerdekaan negeri ini yang bermakna memerdekaan agama Islam daripada sama-sama dijajah oleh penjajahnya. Oleh kerana itu maka mereka (ustaz-ustaz) itu “berfatwa” kononnya kerana perjuangan UMNO bertujuan membebaskan agama maka bolehlah wang itu dijadikan wang kemerdekaan yang dijalankan oleh UMNO kerana jalan yang dibuat oleh UMNO sekarang ialah jalan “*fī sabīl lillāh*”.

Di dalam perkara yang tersebut ini, Warta telah mengambil berat lalu menanya pendapatan-pendapatan ulama’ tentang ini. Rata-rata mereka bersetuju mengatakan bahawa tidak ada hak bagi UMNO mendapat wang zakat itu untuk kemerdekaan sebab UMNO tidak termasuk di dalam nasab yang delapan. Ada pula yang berpendapatan sekalipun umpamanya ia masuk di dalam bahagian yang delapan namun keadaan fakir miskin masih berhajat maka tidaklah dibenarkan sedang Sahibul Fadhilah

Mufti Johor pula memberi fatwanya bahawa perjuangan UMNO itu tidak termasuk di dalam *sabīl Allāh*.

Kerana saya orang awam maka fatwa-fatwa ini yang telah diberi asas dengan alasan-alasan Quran dan hadis saya tidak berani menolaknya. Pada pandangan saya bahawa hampir semuanya telah sefaham bahawa perjuangan UMNO itu adalah perjuangan kebangsaan – bukan perjuangan keagamaan seperti yang diseru oleh tukang-tukang serunya. Hanya sanya ulama-ulama kita masih tidak muh Berkata terus-terang memberi fatwa bahawa perjuangan kebangsaan yang serupa ini adalah perjuangan kebangsaan jahiliyah!

Sebahagian besar daripada orang-orang UMNO masih berkeras

dan tidak mahu terima perkataan orang yang mengatakan bahawa perjuangan UMNO itu telah terpesong. Mereka masih berkeras bahawa perjuangan mereka ialah kerana bangsa, tanah air dan agama. Tentunya bangsanya ialah Melayu, tanah airnya Semenanjung Tanah Melayu, dan agamanya agama Islam. Tetapi terjadi perpaduan di antaranya dengan M.C.A. Maka adakah tetap perjuangannya kerana bangsa Melayu dan agama Islam? Jawabnya yang dapat dipandang ialah menyerahkan perkara itu kepada kesudahan pilihanraya dengan cara demokrat – yakni memberi hak yang sama kepada anak-anak dagang sekalipun kepada mereka yang hanya baharu tinggal di Malaya selama lima tahun. Adakah boleh dijamin apabila kerusi-kerusi majlis mesyuarat itu diduduki oleh mereka bahawa mereka akan memberi kebebasan agama kita atau agama kita itu jadi merdeka sama? Ingat-ingatlah supaya sesudah terlepas baharu menyesal khasnya dalam masa ini banyak orang-orang kita terikut-ikut oleh sebab mereka diseru dengan kalimah-kalimah Allah supaya taat dan mengikut sahaja apa yang dikehendaki.

Sesudah bertaubat parti negara maka yang dipertua dan pegawai penerangan UMNO telah mengeluarkan selaran cara demokrasi (ala tango) iaitu menghendaki supaya semua orang mesti tunduk di bawah bendera UMNO.



KOPI PAHIT

Sesiapa yang tidak taat dan patuh kepada UMNO nampaknya digelar mereka pengkhianat bangsa dan pengkhianat kepada agama. Ahli-ahli UMNO yang telah keluar daripada UMNO dan menubuhkan parti lain adalah diselar habis-habisan dengan dinyatakan jika bekerja kerana Melayu mengapa tidak muh tetap kepada UMNO, seolah-olahnya dasar UMNO itu tetap sebagaimana dahulu lagi. Orang-orang itu diseranah habis-habisan dengan tuduhan-tuduhan “khianat” kepada bangsa kerana menubuhkan parti lain oleh kerana dasar-dasar demokrasi yang diagung-agungkan maka tentulah dengan cara tuduhan yang bertujuan menegah orang berjalan di atas dasar fikirannya sendiri itu bukannya dasar demokrasi tetapi terang ialah dasar diktator kerana tidak boleh ada pertubuhan selain dari UMNO.

Dengan putar belit sekejap berdasarkan demokrasi sekejap marahkan orang-orang membuat pertubuhan lain – akhirnya semuanya jadi pening kepada kerana putar belit itu. Kesan yang besar dengan tidak tentu sesuatu pegangan itu ialah rakyat yang tidak tahu ke mana hala mereka diarahkan. – Cemeti al-Farouk.